

פרק לח

(א) מזמור לדוד להזכיר: (ב) יהוה אל בקצפך תוכיחני ובחמתך תיסרני: (ג) כי חציק נחתו בי ותנחת עלי ידך: (ד) אין מתם בבשרי מפני זעמך אין שלום בעצמי מפני חטאתי: (ה) כי עונתי עברו ראשי כמשא כבד יכבדו ממני: (ו) הבאישו נמקו חבורתי מפני אולתי: (ז) נעויתי שחתי עד מאד כל היום קדר הלכתי: (ח) כי כסלי מלאו נקלה ואין מתם בבשרי: (ט) נפוגותי ונדפיתי עד מאד שאגתי מנהמת לבי: (י) אדני נגדך כל תאותי ואנחתי ממך לא נסתרה: (יא) לבי סחרחר עזבני כחי ואור עיני גם הם אין אתי: (יב) אהבי ורעי מנגד נגעי יעמדו וקרובי מרחק עמדו: (יג) וינקשו מבקשי נפשי ודרשי רעתי דברו הוות ומרמות כל היום יהגו: (יד) ואני כחרש לא אשמע וכאלם לא יפתח פיו: (טו) ואהי כאיש אשר לא שמע ואין בפיו תוכחות: (טז) כי לך יהוה הוחלתי אתה תענה אדני אלהי: (יז) כי אמרתי פן ישמחו לי במוט רגלי עלי הגדילו: (יח) כי אני לצלע נכון ומכאובי נגדי תמיד: (יט) כי עוני אגיד אדאג מחטאתי: (כ) ואיבי חיים עצמו ורבו שנאי שקר: (כא) ומשלמי רעה תחת טובה ישטנוני תחת רדופי טוב } רדפי טוב { : (כב) אל תעזבני יהוה אלהי אל תרחק ממני: (כג) חושה לעזרתי אדני תשועתי: